

佛說所欲致患經

西晉三藏法師竺法護譯

聞如是一時佛遊舍衛祇樹給孤獨園與大比丘衆俱比丘五百爾時諸比丘明旦著衣持鉢入舍衛城諸外道異學問諸比丘沙門瞿曇何因處慧以何別色痛癢思想生死識字苦云何於此諸法有何差特有何志願何因爲成沙門瞿曇現法云何何因開化有所言講諸比丘聞諸外道所言無以報答則從座起尋捨退去各心念言如此所說當從世尊啓問諮受爲我分別尋當奉行時諸比丘分衛已竟飯食畢訖更整衣服往詣佛所稽首足下却坐一面前白世尊說諸異道所可難問悉次第說於時世尊告諸比丘外道問汝愛欲之事有何安樂致何憂患何從興致

因何而滅汝當答報諸外道默然不以言對佛言我不見能解此意分別上義所以者何無能及者非其境界佛察天上天下諸魔梵天梵志諸神及人能發遣此問令意欣悅愛其所樂爲欲所染耳聞好聲鼻識好香舌識美味身識細滑可意欣悅志於所樂爲之所染心貪於法是五所欲從因緣起心以爲樂佛告比丘何等爲所欲之患其有族姓子隨其巧便立生活業多所想念或以技術或作長吏或作畫師或行算術或復刻鏤或以塗度或說色事或以寒凍或逢暑熱飢渴餓死或觸風雨或遭蚊蚋諸根變亂趣此諸事身欲自在求於財寶坐起放心恣意坐於財寶啼哭愁憂槌骨鬱佛吾謂是輩則爲癡冥致無果實猶是精勤不離其業造立屋宅及諸

財賄以獲財寶設不能獲起無央數憂惱諸
愚歌舞將御得無縣官水火盜賊怨家債主
所見奪取燒沒搶突劫害侵暴壞亂家居亡
失財寶彼族姓子心懷此憂卒值水火盜賊
怨家所見侵奪愁憂啼哭不能自勝吾前治
生積聚財業今者霍空無所依仰是為情欲
之憂患也緣欲致愛放心恣意致此惱恨佛
告諸比丘復次因欲貪愛所在放心恣意父
說子惡子說父惡母說女惡女說母惡兄說
弟惡弟說兄惡姊說妹惡妹說姊惡家室宗
族轉相誹謗是為貪欲之患第十因致勤苦皆由
多求放心恣意為欲所溺佛告諸比丘復次
愛欲之患著愛為本放心恣意因貪利故把
持兵仗彎弓撿箭入軍戰鬥與四部兵象馬
車步眾兵共鬪是劇羅網因欲自喪親屬與

親屬興起因緣因貪犯罪馳走不安以求財
產或能獲財或不能得或尋失財愁憂懷惱
拍牘槌骨而以鬱佛吾本多財今者殫盡是
為貪欲之患恩愛之惱放心恣意為之所溺
佛告諸比丘復次因欲之患著愛為本放心
恣意父子相怨母女相憎夫婦相捐姊妹懷
恨兄弟相憎親屬家室自相誹謗是為貪欲
之患恩愛之惱放心恣意為之所溺佛告諸
比丘復次因欲之患著愛為本放心恣意手
執利劍若持刀杖屏處沙中若樹木間若陂
塢間心中怫鬱轉相奪命遙擲火輪沸油相
灑緣是興惡或致病或致死亡是為貪欲
之患恩愛之惱放心恣意為之所溺佛告諸
比丘復次因欲之患著愛為本放心恣意破
他門戶斷人寄餉鑿人垣墻夜行作賊在藏

匿處或復逃亡鬪諍放火國主覺得或使縛束閉著牢獄或截耳鼻手足拷治掠笞或斷頭首或時住立壓踝鹿樞驚搏兔窟或甑或鑊湯煮沸油灑體是爲貪欲之患恩愛之惱放心恣意爲之所溺佛告諸比丘復次因欲之患著愛爲本放心恣意身欲衆惡罵詈衝口心念毒惡不護身口不顧後世壽命終歿鬼神一去墮於惡趣勤苦之處晝夜拷治無央數歲是爲貪欲之患愛欲之惱放心恣意爲之所溺佛告諸比丘復次何因捨欲能樂斷惡一切所欲截諸貪求刈衆情態是爲捨欲其有沙門梵志見愛欲之瑕因與諸患審知如有愛欲已勸助衆人使度於欲假使勸化至於解脫志於愛欲欲度彼岸未之有也若有沙門梵志樂於愛欲不觀愛欲之瑕穢

者若能審識情欲如有無貪諸情開化衆人度於彼岸自度濟彼則獲此事如意無疑其有目覩於此人所愛樂長者家妻梵志之妻年十四五十六二十不長不短不麤不細不白不黑顏貌姝妙如樹華茂佛言比丘初始自覩因緣所興可意歡樂是欲所樂何等爲色因緣之患於是見女人年尊老極年八十若九十年若百二十頭白齒落面皺皮緩身重少氣拄杖僂行羸極上氣行步苦難身體顛頽於比丘意云何極不於端正姝好顏色證患已現比丘對曰唯然是爲色之憂患也佛告諸比丘又見女人終亡之後一日二日至五日六日身色變青胖脹爛臭惡露不淨從九孔出身中生蟲蟲還食其肉於比丘意云何前時端正顏色姝妙今失好貌變證

第十

十七

現乎對曰唯然佛言是爲色之患證也佛告諸比丘若復見女人臭爛在地烏鳥所食鷲所啄虎狼蟲狐所噉無央數蟲從其身出還食其肉於比丘意云何前時端正顏色姝好沒不存乎真患現耶對曰唯然佛言是爲欲之患證也佛告諸比丘若復見女人皮肉離體但見白骨前時端正顏貌姝好沒不復現其患證乎對曰唯然是爲愛欲之患證也佛告諸比丘若復見女人身骨節解手足膝脛鼻耳脅背臂肘頭頸各在異處於比丘意云何前時端正姝好沒不現乎證患現耶對曰唯然佛言是爲欲之憂患證也佛告諸比丘見彼女人指在塚間無央數歲骨節糜碎青白如碧碎壞如麵於比丘意云何前時端正顏貌姝好沒不現乎患證現耶對曰唯然

佛言是爲貪欲憂患證也佛告諸比丘誰能離欲能斷色欲蠲除情色拔貪不習乃不著色其有沙門梵志樂色如是以爲歡然觀其患證觀見生惱審知如有則等於色心無所倚勸化於人使度彼岸設使有人以色倚色欲得度者未之有也其沙門梵志歡喜於色更諸情欲觀色患證欲得離色拔其所情則觀如有等觀諸色勸化諸人令度彼岸知色所倚捨於諸色則可得也佛告諸比丘何等爲痛癢所更樂乎捨諸習耶於是比丘寂於諸欲離於諸惡不善之法不念有想獨處晏然行第一禪設使比丘獲此第一禪者則不貪已不著于彼則無有爭心不懷恚是爲比丘痛癢樂無瞋怒吾無所恨爲樂痛癢是爲樂習所觀樂彼滅諸想樂內念寂然其心爲

一無念無行志寂健安是為第二禪十六假使比丘行第二禪不貪已不著彼心增減彼欲歡喜觀無欲行常以寂定業身則安如聖所演常觀意定行第三禪假使比丘行第三禪是痛癢所樂彼則除苦蠲除所安前所更歷不可意無苦無樂觀其志定具足清淨假使比丘行第四禪是為痛癢所樂復次比丘緣痛生樂可意之欲是為癢所樂何等為痛之憂患因痛生患憂惱之憤是痛憂患又痛癢無常之苦別離之法其法都痛癢起無常苦致別離法是為痛癢之患何等為離痛其於痛癢斷諸貪欲是為離欲其有沙門梵志曉了痛癢諸所更樂觀致憂患不捨諸愛欲審知如有而倚痛癢勸化眾人度於彼岸自得成就濟諸倚著未之有也其有沙門梵志觀

痛癢所樂從樂致患離於愛欲諦知如有等觀痛癢而無所倚勸化餘人令度彼岸自得成就并化餘人此事可致是為捨歡悅如是諸比丘聞經歡喜佛說所欲致患經